


# 黄庭内景玉经注 沐浴章第三十六

沐浴章第三十六神仙刘长生解 沐浴盛洁弃肥熏，洗开道眼，体挂銖衣，水云信任，不羨轻肥。入室东向诵玉篇，闲居宫室，至德真一，悟彻千经，忘言了毕。约得万遍义自鲜，玉诀金声，万遍通灵，功成九转，跨鹤飞升。散发无欲以长存。真心坦荡，放旷林泉，玉壶之内，别有阳天。五味皆去正气还，意远肥甘，自通道味，内养元神，冲和一气。夷心寂闷勿烦冤。绝虑忘言，自然大定，住世居山，内无动静。过数已毕体神精日往月来，阴阳有数，道显神明，全凭开悟。黄华玉女告子情，黄婆匹配，婴姹团圆，静清祥耀，产个胎仙。真人既至使六丁，力士天丁，常护真灵，阴魔奔散，真耀成形。即授隐芝大洞经。真仙之授，太上之经，人问阐度，悟者超升。十读四拜朝太上，十极诵经，四方礼拜，贤圣虚空，众生苦海。先谒大帝后北向，后有金真，来朝大帝，蓬岛瀛洲，群仙列位。黄庭内经玉书畅。黄庭圣降，玉诀真经，理明万化，妙道无形。授者曰师受者盟，默传圣道，玄祖盟约。圣达顿明，贤悟渐博。云锦凤罗金钮缠，仙裳体挂，凤绕龙蟠，金缠九九，降阙清欢。以代割发肌肤全，太上古貌，玉体冰肌，颜如童稚，皓发眉齐。携手登山歃液丹，炼成七返，修就九还，形神妙达，霞友登山。金书玉景乃可宣。圣人金诀，妙达真景，云散天青，蟾光如镜。传得可授告三官，三元功毕，上达三官，真同圣意，名列仙班。勿令七祖受冥患，出家退道，七祖冥愆，一子了道，玄祖生天。太上微言致神仙，神通万法，大远希夷，无为德诀，暗合天机。不死之道此其文。碧霄至圣，今古常新，母养赤子，不死之门。黄庭内景玉经注竟



[下载本文pdf文件](/pdf/5083-黄庭内景玉经注 沐浴章第三十六.pdf)